

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

17 Janvier 2020

21 Jamadi'ul Awwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

La Promesse d'Allah au Prophète & à bane Oroyants (Pt.2)

Par la grâce d'Allah mo pé continuer sa 2^{ème} partie Khutba ki mo ti commencer la semaine dernière là. C'est ene sujet ki bien important pour toute l'humanité en générale et aussi pour tous bane frères et sœurs musulmans à travers le monde entier et particulièrement pour tous bane Ahmadis en générale. Si nous étudier bien le Surah An-Noor (La Lumière) ene Surah la lumière même ki donne l'éclairage à tous dimounes et surtout à tous bane musulmans et surtout encore à tous bane Ahmadis kot Allah (swt) pé dire:

« Wa'adalluhul lazina amanuu minkum wa'amiilus-swalihati layastakhli fannahum fil arzi kamastakhlafallazina min qablihim. »

Allah fine promette à bane ki croire [dans So l'unicité et So message] et montrer ene l'obéissance totale envers Li, et ki faire bane bon actions (faire le bien) ki Li pou faire parmi zot même bane califes (héritiers ou successeurs) lors la terre, pareil couma Li ti faire avant. (Surah Al-Nur 24 : 56).

Donc, c'est ene chapitre ki donne ene l'éclairage extraordinaire, péna sorti de là ki ou pou dire ki ou pas pé comprend sa bane versets là et ou pas pé trouve claire. Allah (swt) pé montrer nous très bien ki dans Ummaté Muhammadiyya aussi Allah pou envoie So bane Khalifa (successeurs) pareil couma Li ti envoie bane Khalifa dans l'*Ummah* de Moïse (Moussa) (as) tel que Haroun (Aaron), Youshaa (Josué), Daoud (David) et Sulaiman (Salomon) - ki la paix Bondié lors zot tous, et sa bane Khalifa là mentionner même dans Quran Shariff. C'est pas bane Khalifa '*elected by men*' (élire par l'homme). Donc, sa verset là signifie ki pou ena bane Khalifa dans bane même titre pareil couma bane prophètes avant zot.

Dans ene Hadith ki trouve dans *Mishkat*, Hazrat Muhammad (saws) explique sa verset là clairement kot li dire [ene longue Hadith – mo mentionne ene boutte là-dans]: « *Takuunun-nabuwatu fikum mashaa allahu... Summa takuunu khilafatun alaminhajin nabuwat summa takuuno mulkan 'azzan... Summa takuno alan minhajin nabuwate summa sakata.* »

Traduction: Présence de l'apostolat pour être maintenue parmi zot tanque ki sa pour plaire Allah (swt); ensuite pour instituer bane Khalifa basé lors le système de l'apostolat et après pour ena règnes de bane les rois méchants et tyranniques... et après pour recommence ena bane Khalifa basé lors système de l'apostolat après le prophète. » C'est tout. [Li fine arrête là-même] (Mazahirul Haq, Vol. IV pg. 26).

À la lumière de sa verset là même et de sa Hadith là, nous capave déduire dépi Quran Shariff et l'histoire de bane prophètes ki kan Allah (swt) envoie ene messenger dans le monde, li pas Allah So but sa ki ene individu vine dans le monde pour amène ene message et puis retourner.

Au contraire avec la venue de chaque prophète le plan d'Allah (swt) c'est ki li [sa prophète là] amène ene changement et ene révolution. Pour arrive à sa but là li nécessaire ena ene système de continuation, parski ene dimoune li pas vivre éternellement ; alors servi li juste pour sème la grain là. Donc, bizin ena ene continuation de arrose la grain là, rasse bane mauvais l'herbe, empêche bane bête attaque sa la grain là ki développer et vine ene plante, protège li pour ki li grandi, so bane branches talé dans différents directions, et kot li rapporte so fruits. Là aussi kan fruits pé rapporter, bizin bien surveiller. Avant ki sa vine ene fruit ki délicieux, ena beaucoup étapes, épreuves li passer : cyclones, la

sécheresse etc. Donc, ou trouver même kan plante ene la grain dans la terre, travail pas fini là même, ena ene travail de continuation.

Ene l'étude de verset *Istikhlaaf* du Quran montrer nous ki le système de prophethood – *Nabuwwah* (couma ou envie appelle li : Messie, Khalifatullah), sa ene système ki Allah (swt) fine établie sa, pas l'homme, mais malheureusement l'homme, par so l'esprit ki li ena, li penser li conne tous zaffaires, li ferme sa la porte de bénédiction divine là, li rode teigne sa la lumière ki Allah (swt) fine donne li pou éclairer li la. Li déclare pli conner ki so créateur, kot par so propre zefore li amène li même dans l'obscurité, dans noirté kot li ferme la porte prophète et la porte de révélation divine. Kan li ferme la porte de la lumière, partout li tombe dans mare-noire.

Donc, voilà ki situation bane musulmans azordi trouve zot kan Allah (swt) fine établie ene système béni, fine donne bane croyants sa comme ene récompense de Li, ki Li fine content avec zot, Li satisfait avec zot, voilà ki Li récompense bane croyants kot Li béni zot et récompense zot avec ene système noble de leadership. Allah fine établie sa système de So leadership divine là, ki Li même Li fine promette, et alors Li accompli So promesse Li même et kot Li même Li choisir So bane successeurs et Li envoie sakaine d'entre zot, dans sakaine so l'époque dans sa communauté de bane croyants ki rempli de *Taqwa*, rempli avec la foi et faire bonnes actions. C'est bane croyants humbles, reconnaissants envers zot créateur ki sacrifier tous seulement pour la cause d'Allah.

Donc, nous capave dire ene Khalifatullah, ene Khalifa ki choisir par Allah et envoyer par Allah et li recevoir révélation divine de côté d'Allah et li faire so proclamation ki li fine vini de côté d'Allah, li ene continuation de l'apostolat et li ene l'ombrage parfait de sa la lumière là. Dans sa l'aspect là, l'image complet de bénédiction de la lumière de l'apostolat capave trouve li dans sa reflet de l'apostolat là. En effet c'est le Khalifatullah ki vine ene témoin de la foi et bonne action de ene communauté de bane croyants.

Donc, le Khalifatullah donne bane croyants ene leçon lors l'unité et la paix. Li là pour unir zot tous, non pas pour diviser ou pou faire mette boycottte, ni crée la haine dans le cœur de bane frères et sœurs, ni pou faire casse relation familiale. Au contraire ene Khalifatullah invite zot tous pour oublier zot bane divergences, nous bane différences, kot nous tous ensemble attrape la corde d'Allah fort (La

corde d'Allah c'est : *Laa Ilaaha Illaallah*), attache nous avec sa la corde divine là, nous tous ensemble, kot nous vine ene seul le corps. Lerlà si ene membre parmi sa le corps là pou souffert, entier sa le corps là pou souffert. Sa même ki Nabi Kareem (saws) ti pé faire nous comprend.

Donc nous attache nous avec la corde d'Allah, l'heure là nous pou trouve nous attaché avec l'*Ummah* en entier, dans l'unité et l'amour et *Insha-Allah* kot avec ene Khalifatullah à la tête de l'*Ummah*, nous fine transforme en ene base solide, kot péna ni boycotte, ni dispute, ni la guerre - verse di sang de nous frères ou sœurs, ni casse relation familiale, ni la haine etc., etc., et l'heure là nous capave dire bien fort ki sa fine planté dans nous le cœur et racine fine bien taler dans le cœur kot li vine au fond de nous le cœur « l'amour pour tous, la haine pou personne ». Lerlà pas pou bizin ena sa lors bel-bel pano, lors bane Masjids, T-shirt, stickers, mais li pou dans le cœur. Mais malheureusement, en ce moment li pas coumsa. Le cœur là dire le contraire de céki ou pé présenter devant l'homme. Pas faire sa pour faire l'homme plaisir, ou sois pour montrer dimounes, faire bane bons actions pou plaire ou créateur seulement, pour la cause d'Allah, lerlà ou pou gagne sa bénédiction divine là kot Allah (swt) pour récompense ou par So choisi et bane la pluie divine pou descendre du ciel pour purifier ou. *Insha-Allah*.

Insha-Allah, mo pou contigner le sujet de sa Khutba là semaine prochaine. *Insha-Allah*. Ki Allah ouvert le cœurs de bane musulmans pou comprend sa message là bien. *Insha-Allah, Ameen*.